



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir\_yimyim



tir yimyim

TAPAK 6

Afghanistan den ODI asayamung nung Kohli masayatetsü akok

Raja Sabha election atema MDA-i James P K Sangma shimogo

VOL. XXIII ISSUE NO. 232 (ADOK 232) DIMAPUR ROGONÜ (FRIDAY) AAMI (JUNE) 05, 2026

₹ 5.00

## NGBF-i 'underground' tax bendenba soiter

**Dimapur, Aami/June 04 (TYO):** Nagaland Gaon Buras Federation (NGBF) ajanga Kiphire Town GBs Union dang 'underground' teloktem atema annual employment tax meshia shiti ka zülua alibaji tangsa agienang ta totuyuba agütsüogo.

Brehostibarnü sangdong ka agütsüba nung federation yagi Kiphire Town GBs Union ajanga 'Collection of Annual Employment Tax for Underground for the Year 2026-2027' subject nung shiti ka prokshiba athishia liasü.

Pamoki Kiphire Town GBs Union dang iba inyaksangshi jangjatsütsü ashi, aser iba sülen union-i parnok dang yangji yimjung aser tesunep lidaktsütsü tebilemba tejangja nung nisung telok kar ashiba ama inyak ta metetdaksü, ta NGBF-i ashi.

Ajisüaka NGBF-i iba ama inyaksangshi ya gaon buras inyakyim nung mali, ta federation-i ashi.

"NGBF-i GBs aser federating units ajunga dang asen akhum, meraket aser tenüing menütsüsa inyakyim nungi pila alitsü shisa agüja arur," ta ashi.

Anungji federation-i Kiphire Town GBs Union dang iba ama saru bendenba dak sendakba shiti tangsa agienang ta totuyuba agütsü.

Nagaland nung gaon buras temi akhi mapang nungi Naga political movement dak sendakba mapa jenti inyaka arur, ta NGBF ajanga ashi.

Iba movement tenzüka mapang nungi gaon buras temi nübu, shisatsü aser rongsen tenla agüja aru aser tanü tashi jila aser yimtsüngtem nung yimya balala amshia tenüing tamajung agidakja timtem agütsüba lir, ta ashi.

Naga political groups temi gaon buras aser village councils inyakyim meteta lir, ajisüaka aiben timtem ajurur, ta federation ajanga ashi.

## Nagaland nung tobacco/ nicotine aliba chiyongtsütem küm ka atema nokdang

**Dimapur, Aami/June 04 (TYO):** Department of Health & Family Welfare, Nagaland ajanga sangdong ka nung, state tesem ajunga nung gutkha aser pan masala nung tobacco mesüra nicotine den meyokteper aliba densema ingredients ama tobacco mesüra nicotine aliba chiyongtsütem yangluba, processing, packaging, bendenba ayuba, belenba, alemba aser ayokba nokdang, ta metetdaksüogo.

Iba sangdong ya Food Safety and Standards (Prohibition and Restrictions on Sale of Certain Products) Regulations, 2011 indang Regulation 2.3.4 nung aliba ama inyaker, kong chiyongtsü nung ingredients ama tobacco aser nicotine

amshitsü memelar, ta sangdong ajanga ashi.

Food Safety and Standards Act, 2006 kübok tobacco aser nicotine ya nokdanga aliba ingredients lir, koba ajanga temang nung timtem tulu agütsür, ta department-i ashi.

Manufacturers temi gutkha nokdangba paidoka pan masala aser flavoured chewing tobacco ya sachets balaka nung inoker külemi ayokba ajanga nüburtemi meyokteper achir, ta ashi.

Food Safety and Standards Authority of India (FSSAI) aser Supreme Court totuyuba nung anidaka iba tenokdangba ya state tesem ajunga nung küm ka asoshi alitsü, ta metetdaksü.

## Nagaland Angh-i state nung lanurtem aser terenlok asoshi jemb



Union Home Minister, Amit Shah aser Union Minister for DoNER, Jyotiraditya M. Scindia den North Eastern States nungi chief ministers aser governors tem Shillong nung June 04, 2026 nü North Eastern Council (NEC) indang 73rd Plenary Session amendang tangokba noksa nung angur.

**Dimapur, Aami/June 04 (TYO):** Nagaland Angh Nand Kishore Yadav-i June 4, 2026 nü Shillong nung North Eastern Council (NEC) indang 73rd Plenary Session nung jembidang region nung amalitep tali akatsü, tesendaktep tajungba akumtsü aser infrastructure, youth empowerment aser sustainable development nung rongsen tali indoktsü ayongzüka liasü.

Pai iba senden nung jembidang, yimchiyimjung, sustainable aser ajak adenba Northeast yangertsü asoshi Nagaland indang temlungtetba ya atangji lir ta ashi aser Viksit Bharat @2047 aser Viksit Nagaland mangdang ataloktsü atema region lungjemer inyaksü ya tiyong südaksür lir, ta metetdaksü.

Nagaland indang rongsenketzüng asoshi aluyimba ya tongtoret ama lir, kong nütsüng yongsük shilem 70 dak tema yimdak yimtsüng nung alir aser takum alitsü asoshi rongsen lenmang atema aluyimba aser

sendaktepa aliba inyakyim nung metaloka alir, ta Yadav-i ashi.

Nagaland nung mozü mamshi adokba chiyongtsü aser osettsüset, talisa jiru, züangi, persimmon, Naga King Chilli, coffee aser süngya (agarwood) amala yoktettsüsa value chains, certification aser market access alitsü tongtipang lir, ta ashi.

Tesendaktep aser ki o jen dak sendakba nung jembidang Angh-i Ciethu nung airport amenoktsüba, Mokokchung, Tuensang aser Mon nung airstrips yanglutsüba nungdakba indang lemsatepa liasü. Pai Foothill Road aser railway projects tem asoshia jembida aser iba ama tesendaktep ajanga state tesem balala nung industrial, ali rongsen aser aluyimba tsütsü teimla aliba lapoka aotsü ta ashi.

Yadav-i Nagaland nung kaket reju tongtipang maliba tebilemstü lemsatep aser national mesüra regional institutions amenoktsü asoshi bilemstü ayongzüka liasü.

Pai state nung sustainable

development indang onük bener arua jembidang, North Eastern Region District SDG Index 2.0 nung Mokokchung, Kohima aser Dimapur district tem ya 'top ten performers' nung dena lir ta ashi.

Industrialization aser energy security indang jembidang pai scientific mineral exploration aser sustainable resource development asoshi tali yaritsü ayongzüka aser rooftop solar systems ajanga energy nungdakba shilem 15 peritsütsü nükjidong nung Nagaland Solar Mission densema mera balala agiba indang lemsatepa liasü.

Nagaland Angh-i saisapong, sobaliba aser tourism ajanga state nung nüburtem aser rongsenketzüng tajangzüka aliba indang lemsatepa liasü.

Yadav-i terenlok maparen nung tawa alidak apu alatsü aser region tekeraba nung renloka aotsü asoshi Northeastern states tir prongla nem tashi, senotsü teyari tali agütsütsü ayongzüka liasü.

## CM Rio-i state atema flyovers 14, airport, IIT & AIIMS meshir

**Dimapur, Aami/June 04 (TYO):** Brehostibarnü Nagaland Chief Minister Neiphiu Rio-i Dimapur, Kohima aser Chümoukedima nung traffic sadema mejajatetba tebilemstü tali akumba nungi anitettsü asoshi tongtipang tesemtem nung flyovers aser elevated corridors 14 yanglutsü sentong lemsatepa liasü.

Shillong nung North Eastern Council (NEC) indang 73 buba plenary session nung jembidang Rio-i item projects asoshi NEC aser Ministry of Development of North Eastern Region (DoNER) teyari meshia liasü.

Iba senden nung Union Home Minister and NEC Chairman Amit Shah, Union Minister for Communications and DoNER and NEC Vice-Chairman Jyotiraditya M Scindia, aser Minister of State for DoNER Sukanta Majumdar nungertem dena liasü.

Nagaland tenüing nung Rio-i

iba senden nung jembidang, state nung tang inyaksütem, senotsü tebilemstü aser infrastructure & development projects balala indang lemsatep aser item inyakyim nung Government of India, NEC aser DoNER ministry teyari meshia liasü.

Flyovers den külemi chief minister-i 16th Finance Commission indang recommendations kübok Revenue Deficit Grants (RDG) anenba sülen state indang senotsü tebilemstüsa lemsatepa liasü.

15th Finance Commission mapang RDG nung Nagaland nem sen 21,000 crore dak tema agütsü, koba ajanga state nung senotsü indoktsü nungdakba peria aser tongtipang public services agütsüteta liasü, ta pai ashi.

Iba grants anenba ajanga 'fiscal gap' adokdaksür aser 2026-27 financial year mapang Nagaland nung taruba aser teindokba nung tetsüngta sen

4,500 crore shi adoker, ta ashi.

SASCI kübok Part X - Pride of Hills ajanga 2026-27 atema sen 3,880 crore lezmütsüba teyari asoshi pelar, ajisüaka iba iba teyari ya 'loan-based' aser condition lir, ta Rio-i ashi.

Pai Finance ministry dang annual special grants ya ano asadangshia metokmeperi nung yaritsü ayongzüka liasü.

Rio-i 364-km Foothill Road (Trans-Nagaland Highway) tekeraba nung yanglutsü asoshia teyari meshi, koba state indang 'principal economic corridor' akumtsü teimla lir, ta ashi.

Ministry of Road Transport and Highways ajanga National Highway ama sangdonga yanglutsü atema encumbrance-free Right of Way tahemba agi metre 30 bo nungdaksü ta ashir, ajisüaka state sorkari RoW indang metre 12 angati agütsütsü no-objection certificates meshiogo aser tanüingba metres 18 atema ali kiburtemi meshiba

ama compensation nungdaksü, ta Nagaland CM-i ashi.

Pai Centre dang ali atema aser ki o jen raksaba asoshi compensation asoshi teyari meshi aser Foothill Road ya National Highway ama sangdongtsü mepishi.

Air connectivity onük süoka jembidang, kinük nung airport maliba state capital ji Kohima kisüng lir ta ashi aser state-i mapang talangka nungi Ciethu nung airport yanglutsü lenmang bushiba indang nenshia ashi.

Airport Authority of India-i Ciethu nung airport amenoktsü ya technical tsütsü nungibo tetemstü ta ngutetogo saka senotsü mechi iba project tejakleni maor, ta pai ashi.

Pai khen atema Mokokchung, Mon, Tuensang aser Ciethu nung short landing strips yanglutsü onük benoka liasü.

Rio-isa Dimapur-Zubza railway line ya Kohima tashi atsülangtsü aser Imphal leni aotsü

atema teyari meshi aser ano Dimapur-Tizit railway project tekeraba nung approval agütsütsü ajungshia liasü.

CM-i ano Nagaland-i Intian Institute of Technology (IIT) atema akhangba nenshia ashi aser 2015-16 Union Budget mapang Indian Institute of Science Education and Research (IISER) yanglutsü sangdongba asangsang mekumtetba sülen Nagaki City yanglutsü aliba IIT atema ali nguteta lir, ta ashi.

Pai Nagaland nung Greenfield All India Institute of Medical Sciences (AIIMS) ka amenoktsü aser Nagaland Institute of Medical Sciences and Research, Kohima tashi itshtitsü atema senotsü teyari meshia liasü.

Rio-i Chümoukedima district nung Nagaki City ya Greenfield incubation city ka ama yanglutsü sentong benoka tongtipang ki o jen asoshi special package meshia liasü.

(Maneni tapak 2 nung...)

## Para Military Forces tem inyakyim AYO-i nokdang



**Dimapur, Aami/June 4 (TYO):** May 29 aonung tejak meyibanger aliba Para Military Forces temi Mt. Tabor (Jotsoma by-pass road) anasa Regd.No. AS01EC- 4296 ket aliba truck ka bushisüngdanga iba nungi oset agizüka aliba Angami Youth Organisation Volunteer tem kari ngushia liasü.

AYO Volunteer temi iba truck nung IMFL yi bena aliba nguteta liasü. Ken o ashishiba mapang armed Para Military Forces personnel tem iba tesem nungi jena oa liasü. Sepaitemi temulung malemtsüsa jenjang agiba ajanga volunteer temi AYO office nem osang agütsütsüsa aküm. Iba ya süoki ia agitsüba ken o ka asünung AYO ketdangsurtemi yi ya pua parnok ket nung ayu.

Ali aser nürtem kümzüka ayutsü asoshi bendanga agütsür aliba dak ajemdaker tatalokba dak sendakba nung AYO-i yakta dang ken o bushisüngdangba sülen law-enforcement agency tem nungi ketdangsur/sepai kar aser ozüing alema inyaksangshirtem tsüingda tesendaktep aliba puteta liasü, koba tebilemtsü ka lir.

Shibelenertem aser temzüing ozüing benoka inyakerem tsüingda tesendaktep aliba ajanga National Highway aser

Kohima-i aoba lenmangtem kübok tesem balala nung mapang shia meita aoba sentong benokaka, ozüing alema shibelenba oset aika sadem sadema bener oteter. Iba inyakyim ya AYO-i putetogo aser kanga süoki ia agir, ta ketdangsurtemi ashi.

AYO-isa Ketdangsurtemi jenjang tapet magiba ajanga NLTP Act junga benoka inyaksangshi mesütetba ashishihogo, koba ozüing alema inyaksangshibatem nokdangtsü atema benoka liasü. Tang NLTP Act ya state agency kar aser shibelenertem tsüingda tesendaktep akangshitsü asoshi teyari agütsüba hadir ka kümogo.

Iba inyakyim ajanga Kingpin kar, shibelenertem aser ketdangsurtem kar ajanzüker aser iba ajanga state Revenue akoksadaksür. AYO-i, iba inyakyim ya aitsür aser iba inyakyim ya repranga dang atar ka masütsü, koba lokti atema timtem lir. AYO-i maneni nürtem ajanzükdaksütsü atema bendanga agütsü inyaksü aser iba amala inyakyimtem metetra jenjang tapet agitsü, ta kasa sangdong ajanga metetdaksü.

Temzüing ozüing sülen tashi anga anidakba lisopur kaka ama AYO-i yi ya Deputy

Commissioner (Zonal) Excise and Prohibition Department Kohima aser Jotsoma Youth Organization (JYO), Tsütunuomia Youth Organization (TYO) nunger matsüingdang Excise and Prohibition Department Kohima nem bendanga agütsüogo. AYO-isa, JYO & TYO na dang parnoki teyari agütsüba atema pelaba lemsatetp.

Maneni Angami Youth Organisation-i parnok tazüokba kübok aliba tesemtem nung ozüing alema inyaksangshibatem maneni meita atatsü. Ozüing alema shibelenba osettem bener aruba, ayokba mesüra tsütatetpbatem mesüra ozüing alema maparen balala nung densema alirtem anema AYO dak apet jenjang agitsü.

AYO lanur volunteer tem lokti kümzüka ayutsü atema taten makai inyakba mapang kari danga parnok amomerena merenshira mesüra iba amala inyakyi indang osang agütsüba volunteer aser ozüing sülen tashi anga anidakba lisopur kar anema jenjang agira kanga süoki ia agitsü. Angami Youth Organisation-i aibelenertem anema jenjang tapet agitsü, ta tir aser General Secretary nati külem sangdong ka ajanga metetdaksü.

## Climate Action onem dak ajemdaker tetoktepba ayongzüka agi

**Dimapur, Aami/June 4**

(TYO): Mission LiFE kübok World Environment Day 2026 nungdem nung pre-campaign nung shilem ka ama Department of New & Renewable Energy (DNRE), Kohima-i, high school kaketshirtem atema otsünü zülutepba, yimyim zülutepba aser drawing yanglutepba tetoktepba ayongzüka agiogo.

Iba tetoktepba ya "Climate Action" omen nung ajemdaker June 2 nü Directorate of New & Renewable Energy, Kohima nung agiogo.

Sentong nung o jembiba mapang Director Er. James Khala-i, terenlok maparen balala benoka inyakba mapang tzü mopung kümzüka ayutsü aser alirongsentem wazüka ayutsü koda tongtibang iba indang lemsatetp. Paisa, kaketshirtem dang tarutsü putu atema asen aliba lima kümzüka ayutsü atema shilem tajung agitsü ajungshia liasü.

Yimyim zülutepba tetoktepba ya Baptist Mission School, Jotsoma nungi Anguni Nagi-i akok aser kasa school nungi Neisavono Nagi tanabuba jenjang nung liasü. Oking Christian School nungi Chozhi Rose aser Alderville Higher Secondary School nungi Mulusetto Swuro na tasembuba

jenjang nung liasü.

Drawing yanglutepba tetoktepba ya Baptist Mission School nungi Ketoubi Semo-i akok aser Alderville Higher Secondary School nungi Thejaser Sano aser Suman Teron na tanabuba aser tasembuba jenjang nung liasü.

Otsünü zülutepba tetoktepba nung mezüingbubaji Don Bosco Higher Secondary School, Kohima nungi Neilakieü Miachieo liasü aser Alderville Higher Secondary School nungi Kethoseno Nakhro aser Baptist Mission School nungi Thejasier Nagi na tanabuba aser tasembuba jenjang nung liasü.

Ajak senteper item tetoktepbatem nung school troki shilem agia liasü. Sentong nungsa Joint Director Lhuobeizo Kesiyie-i Tsüingrem temaotsü meshizüka sarasadem aser Additional Director Er. Inaho P. Awomi-i sentong nung shilem agirtem pela agizükba o jembiba. Maneni Deputy Director, Neizen Peseyie-i kaketshirtem nem tetoktepba balala indang guideline tem metetdaksü.

Tetoktepba nung takok angurtem nem sempet lemtsüba sülen Joint Director Er. Renilo Nuh-i tepela o jembir sentong tembanga liasü.

## National Children's Fund kübok application tem jaokogo

**Dimapur, Aami/June 4**

(TYO): Department of Social Welfare aser Ministry of Women and Child Development shiti dak ajemdaker Kohima Deputy Commissioner-i sangdong ka ajanga, National Children's Fund (NCF) kübok 'Care and Education' category tasen ka benokba metetdaksüogo.

Iba scheme ya kiralongrar inyakyim, Left Wing Extremism (LWE), insurgency mesüra arrtsü adena raratepba mapang lajar akümba mesüra chiyongtsü, tilidak ki mesüra rongsen makai akümba tanurtem nem parnok anepalutsü aser shilyim atema senotsü teyari agütsütsü nükjidong nung benokogo.

Kohima Deputy Commissioner tekolak ser District Committee nem, scheme kübok proposal tem benoktsü atema district nung iba amala tanurtem bushiteta aotsü aser parnok temsüa ali mali aji jangjatsü atema nongloktsüogo.

Iba dak sendakba nung, National Children's Fund kübok senotsü teyari agitsü atema Kohima district kübok temsüa alirtemi application tem benoktsü jaokogo.

Scheme kübok, Class XII tashi, ITI, diploma course balala, computer course tem aser ibala mesükba educational programme tem atema tanur ka nem shisaluyimtsü asoshi itashia sen 1,250 agütsütsü.

Graduation aser post-graduation course balala bushiba beneficiary tem nem ita shia sen 1,500 agütsütsü. Kasa mapang nung medical, engineering aser professional studies amala professional course balala nung züingoksema alirtem nem ita shia sen 1,700 agütsütsü.

Temsüa aliba beneficiary tem dang parnok indang application tem Office of the Deputy Commissioner, Kohima ajanga District Committee nem agütsütsü mepeshia metetdaksüogo.

## CM Rio-i state atema flyovers 14, ... (TAPAK 2 NUNGI...)

State nung waterways nükla aliba lemsatetpang, Tizu-Zungki river system nung National Waterway-101 sangdongogo, aser Shilloi, Noun easer Doyang waterways dak sendakba proposals asadanga mapang lir ta pai ashi.

Paisa aluyimba, allied and plantations areas nung connectivity tajungba akumtsü asoshi teyari meshi aser coffee

aser agarwood ajungkettsü ayongzüka liasü.

DoNER ministry ajanga Cluster-Based Coffee Value Chain Development Programme yariba atema Rio-i pelaba lemsatetp aser state-i tang coffee lu 12,000 hectares nung aliba ya 'Taste of Einence' brand kübok 2047 tashinung 50,000 hectares kumdaksütsü nükjidong lir ta metetdaksü.

Pai maneni power transmission system tashi itshitsü atema teyari meshi, hydroelectric projects mapa kuma inyaksü, sports infrastructure uluhsitsü aser lanur terenlok sentongtem nung yaritsü ayongzüka liasü.

Ano CM Rio-i High-Level Task Force on Handloom and Handicrafts indang convenor ama, task force indang final report agüja liasü.



Changtongya Kaketshir Telungjem -i Department of AH & Veterinary services, Mokokchung, Nagaland den teka amteper, shiruru wara nungi kumzüka ayutsü asoshi seminar ka 31st May 2026 anogo nung, Changtongya yimtiba community hall nung agia liasü. Iba seminar nung shisalen sayutsü asoshi parnok doctor 5 arua nurburtem den parnok shisatsu tajung lemsaba shilem agia liasü. Iba seminar nung nisung 70 shi -iarua tena tajangzuk jenti ngua liasü aser iba den ji kulemi department nungi shiruru asoshi mozu angati agutsua liasü.

## NSSB-i correspondence address metetdaksü

**Dimapur, Aami/June 6**

(TYO): Nagaland Staff Selection Board Regulations 2020, 1st Amendment kübok Selection 13 (1) Clause (a) dak ajemdaker ken o dak sendaka aliba Department tem dang board den teküboklen agüja aliba address ajanga official

correspondence sütettsü, ta metetdaksüogo.

*Official correspondence address:*

The Secretary, Nagaland Staff Selection Board, Below Nagaland Public Service Commission, Nagaland Kohima, Pin-797004.



June 04, 2026 nü Noida nung Noida Authority office anasa aluyimertemi ochimashi aser sübokrem anema longkak aitba noksa nung angur.

### AP sorkari kibongtem dang tanur aika asotsü ajungshir

**Amaravati, Aami/ June 04 (Agencies):** Kibongtem dang tanur aika asotsü ajungshitsü atema Andhra Pradesh state sorkari tanur asem dak tali agiba kibongtem nem senotsü teyari densema teyari balala agütsütsü tebilemba aliba metetdaksü.

State sorkari, 1990s mapang nung kibong shia nung tanur 3 shi liasü, ajisiüaka tanübo kibong shia tanur "average" 1.5 dang lir, aser ibaji 'replacement level' 2.1 den ishiba lir, ta ashi.

Tang linük nung kibong shia tanur 1.9 nungi 2 tashi lir, saka state nungbo kibong shia tanur 1.5 dang lir, ta state sorkari metetdaksü.

Kibongtem nung tanur asoba rate kanga ajema akümba den külemi tain nütsüngbo teimba dang akümba ajanga tarutsü

nung mapa inyakertem nütsüng kanga ajema alitsü aser ibaji ajanga timtem ajurutsü, ta ketdangsertemi metetdaksü.

Kiojen asüba aser shisaliok jenjang kanga tasakba akümba den külemi menoa mapa manguba kulitem ajanga kibong aikati kibong tila ayur (tanur ishika dang agir/asor).

Ajioda tanur aika asotsü atema ajungshitsü atema tanur aika aliba kibongtem nem senotsü teyari agütsütsü atema state sorkari benokogo.

Kibong nung tanur asem buba asodang sen 30,000 teyari agütsütsü aser tanur pezübuba asodang sen 40,000 teyari agütsütsü. Iba dak alia küm pongu tashi item ama kibongtem nem ita shia sen 1,000 teyari agütsütsü aser

tanurtem arrshi küm 18 majung tashi shisaliok angati agütsütsü tebilemba lir.

State sorkarisa tanur asem buba aser pezübuba asortem nem 'maternity leave' talangba agütsütsü aser "Thaliki Vandanam" programme kübok tanur tetsütem nem kidang nungi dang mapa inyaksü atema maongka agütsütsü.

India nung talisa south tsütsülen aliba state tem nung kibongtem nung tanur asoba rate kanga ajema kümdar.

Tesüiba küm aika alima nung nütsüng teimtiba aliba linükji China liasü saka 2023 küm India-i China ajateta nütsüng teimba aliba linük kümogo, ajisiüaka India nung tanur asoba rate kanga ajema akümdang tain nütsüngbo teimba dang akümer.

### Ebola wara aliba linüktem nungi arur nisung asem Chhattisgarh nung lir

**New Delhi, June 04 (Agencies):** Africa nung Ebola agi kongshiba linüktem nungi meyipa arur nisung asem Chhattisgarh kübok Durg district nung tangar dang nungi pilar yua lir; par asem dak Ebola tashidak temaitsü kecha mali ajisiüaka parnok anogo 21 tashi 'home isolation' nung ayutsü, ta Brihostibarnü health ketdangsertemi metetdaksü.

Durg Collector Abhijeet Singh-i, May 31 nü tetsür ka Democratic Republic of Congo nungi Durg-i meyipa aru, June 2 nü nisung ka Ethiopia nungi Bhilai tonga aru aser June 2 nü nisung ka Uganda nungi Bhilai tonga aru, ta metetdaksü.

Chhattisgarh-i meyipa arur nisung asem rongnung ana India nunger aser kabo Uganda nunger lir, ta Singh-i metetdaksü.

"Par asemprongla dak iba tashidak temaitsü kecha mali mesüra tashidak keta alirtem ajurua mali, ajisiüaka parnok

asemprong anogo 21 tashi 'home isolation' nung ayutsü. Tang tashi nungbo par asemprong health kanga junga lir," ta paisa metetdaksü.

State nung health ketdangsertemi anogo shia ainlen senzürtem mita repringdar.

Ketdangsertemi par asemprongla dang nenok temang nung timtem kar danga adokra mesüra Ebola temaitsü lira idangyongjisa tracing team, health department, control room mesüra Chief Medical Officer nem osang metetdakjang ta tuyuogo.

Durg Chief Medical & Health Officer Dr Manoj Dani-i, bendanglen nungi aruba passenger tem airports nung screening asür, ta metetdaksü.

Taküm May 17 nü World Health Organization (WHO)-i Democratic Republic of Congo aser Uganda na nung putetba Ebola ya Public Health Emergency lir, ta sangdonga liasü.

### NC lenirtemi Delhi-ia J&K atema state jenjang meshitsü



Jammu & Kashmir Chief Minister Omar Abdullah, minister tem, MLA tem aser MP temi Dachigam National Park semdangba mapang tangokba noksa nung angur.

**Srinagar, June 04 (Agencies):** Tzüngluruwa mongpu Parliament senden tenzüka anogo nung National Conference (NC) nungi lenirtem Delhi-ia aotsü aser Jammu & Kashmir nem tanaben state jenjang agüjang, ta takhangba agütsütsü.

NC MLA tem senden amenba mapang nung parnoki iba telemtebaji agia liasü.

Senden tembangba sülen osangbenertem den jembidang NC otongdar, Tanvir Sadiq-i, NC-i linük yimtiba nung iba onük benoktsü aser Parliament senden agiba mapang nung yimtenren party balala dang teyari meshitsü, ta metetdaksü.

Sadiq-i, "Asenok dang nungi kangshia rakzükbaji tanaben meyipa meshitsü atema asenok dak temeden lir. State jenjang meshitsüji ozü party atema tongti onük lir," ta ashi.

NC lenirtemi state jenjang atema democratic inyakim ajanga linük temzüng kübok inyaksü; party nungi teshimtet telok kati yimtenren party balala nung lenirtem ajurua teyari meshitsü, ta paisa metetdaksü.

J&K Chief Minister Omar Abdullah-i minister tem, MLA tem aser MP ajak Dachigam National Park-i anir oa senden amenba mapang nung iba telemteba agia liasü.

Opposition party temibo NC aija, ibaji senden amentsü atema aoba masü saka nüburtem timtemba mapang nung parnok südoksünema kazütsü atema aoba lir, ta aitsü.

BJP MLA aser Opposition lenir, Sunil Sharma-i, ibaji tejak meyidoktsü atema lir; sorkari nüburtem dang tiyazü jembir, ta metetdaksü.

"Jammu & Kashmir nung nüburtem tzü tajemtsü aser electricity agi anünga mapang ka nung Chief Minister den par minister tem aser MLA tembo Dachigam nung südoksünema kazür," ta Sharma-i aitsü.

People's Conference chairman Sajad Gani Lone-ia, Chief Minister-i meta repringa senzür raliwalir ka ama inyaksangshir, ta aitsü.

PDP lenir Iltija Mufti-ia arem shiruru wazüka ayuba tesem ka nung ang NC-i senden akaba atema NC aitsü.

### June 8 nü opposition INDIA teloktep senden nung DMK madentsü

**Chennai, June 04 (Agencies):** June 8 nü opposition INDIA teloktepi New Delhi nung senden ka ayongzüka lir, ajisiüaka DMK-ibo iba senden nungji madentsü ta metetdaksüogo.

DMK ya INDIA teloktep nung tongtibang tongshi ka lir, ajisiüaka tawa Tamil Nadu nung assembly election osang sangdongba sülen Congress-i Tamilaga Vettri Kazhagam (TVK) pusemba atema DMK-i Congress dang kanga mepelar.

Ibaji Congress-i DMK ashioktsüba lir, ta DMK-i metetdaksü.

Brihostibarnü DMK-i sangdong ka ajanga, "Tamil Nadu nung assembly election agiba sülen Congress party-i DMK ashiokja liasü, aser ibaji ajanga DMK züngsemtem temelung kanga yiruogo aser tang tashi temelung yirua lir, anungji June 8 nü New Delhi nung ayongzüka INDIA teloktep senden nungji DMK-i shilem magitsü, kechiyong iba senden nungji Congress party-i shilem agitsü lir," ta metetdaksü.

DMK-isa, party-i iba senden nungji madentsü ajisiüaka maneni tanga party tem den

longjemer linük nung tongtibang onüktem atema ola adoktsü, ta metetdaksü.

Tamil Nadu assembly elections nung DMK aser Congress nati lokteper toktepa liasü, ajisiüaka TVK nem sorkar kümdaksütsü nükjidong nung Congress-i TVK yari.

Iba election nung single largest party ji TVK liasü; TVK-i menden 108 nung takok angu, saka parnok kijai sorkar akümtsüsabo menden peria menguteti liasü. Iba ama tensa ka nungji TVK nem sorkar kümdaksütsü atema Congress-i TVK yari.



June 04, 2026 nü Bengaluru nung taoba mapang Karnataka Chief Minister Siddaramaiah-i state Congress Tir tasenba, BK Hariprasad (abelen) nem tetushi agütsüdang tangokba noksa nung angur.



## TIR YIMYIM YIMOBILEM (EDITRIAL)

DIMAPUR FRIDAY, JUNE (AAMI) 05, 2026

### Alima Lipuküm Anogo

**T**anü Ammi (June) ita 5 anogo ya alima ajunga nung Lipuküm Anogo lir. Lipuküm tetezü Alima nung tzü mopong meraksai junga lidaktsütsü asoshi tepu kuma jembiba aser inyakba anogo lir. Ibaji temesung nung oshi nungbo " World Environment Day' asütsü. Taküm 2026 küm iba anogomung ya Azerbaijan lima Baku yimti nung United Nations Environment Programme (UNEP) ayongzüka tongti sentong agitsü. Iba küm Alima Lipuküm anogomung asoshi shimtetba omenji " Tzü Mopong Asoshi, Asenok Tarutsü Anogotem Asoshi, Alima yimyai Ajungshiba," ta agüja lir. Atangji, iba alima lipuküm anogo mung 1972 küm nung tenzüka amungba tangatetba aser nukjidongji ka dang lir, aji alima ya alima nung alir ajak asoshi ki lir aser iba ki yabo aika masü saka ka dang, anungji ya samara ojang aser alima nung nisungtem ali majungtsüsa tzü mopong kümra, jena aolen malitsü. Iba shisabolu jagi, alima nung tzü mopong tatsük kuma aoba meteter aser angurtemi alima nung taküm alirtem ajunga kumdangdakja aymoktsüba osangji "Alima Lipukümmung' amongtsüba osang ya lir. Iba anogomung ya alima nung lenirtem asoshia alima nung tzü mopong memenendaktsüi kümzüka ayutsü asoshi nübortem ajungshiba dang masü saka peisasa tenangzükba tajung agia mapa agi sayu tenzükba sabang aser mapang tajung ka lir. Aji oda, alima nung taküm ali majungtsüsa nisungtemi peisasa mebilemdangi aser mekümdangi inyakba ajanga atalokba mapa tulu ana lir, kaji mopong tsüka kumdaktsütsüsa industry-tem nung mapa inyakba aser ano kaji gari tali tali kuma teimba senzüba ajanga mopong tsüka kumdaktsüba timtem aser tebilemtsü ya asütsü. Aji oda, kodang alima nung mopong tsüka kümdir, temekong lima nung rüjep agi tenem kuma alibatem ajak yimsaa aoer aser iba jagi tzüim nung tzü mobanga atudaktsür. Aji oda, tanü putu nungbo alima nung ya tzüim küm nung alirtem asoshi shisabolutsü kaji, tzünglu tali aruba agi masü saka tatsük agi rüjep agi akümba tenem tekongtem yimsaa aoba ajanga tzümetsung arua nisungtem aliba yimti dena mobanga atsüngbangtsü tenzükba timtemji lir. Atangji, item timtemji dang masü saka alima nung tzü mopong tsüka akümba ajanga alu majunger, tashidak wara tapu balala pokteter aser nisungtem libalirutsü jenjang tasakba akümer. Item timtemji khen nung ajungbena tesem ka nungi adokba timtem masü saka alima tesem ajaklen nisungtem libaliru nung mekümdang aser mebilemdangi inyakba ajanga meilongi-meilongi atalokba timtem lir. Aji oda, alima nung tzü mopong menena akümba mapa nung ya nisung shia pei pei shilem dena lir, anungji ano tzü mopong merüktetsüba nunga nisung shia pei pei tata teinyaktsü shilem lir ta angatetdi. Iba tangatetba nung, teti meinyaktetaka, tanü ama alima lipuküm anogo nung asenok kari süngdong kaka danga atemtsüa akok, kari kima yimdong, arem aser ayong nung polythene osettem agi janar alibatem bendena endoktsütsüa akok aser ano karibo yimküm tzübo mesemteta amongtsüa akok. Item denji ano asenoki iba lipuküm anogo nungbo akok tashi gari mamshii tetsung agi mesüra bicycle nung senzütsüa akok. Item ama asenoki alima lipuküm anogo nung pei pei akok mapa tilakati danga alima nung tzü mopong memenendaktsüi kümzüka ayutsü asoshi inyakra, iba jagi mapa tulu kuma alima nung nisungtem anitesüngzükba kuma litettsüsa alima nung tzü mopong memenendaktsüi kümzüktettsü. Atangji, asenoki alima ajak kümzüksüsa mienyaktettsü amai bilema alitsüa akok, saka asen alidak asenoki süngdonglidong kümzüka ayuba agi alima ajak teyari angutsüsa mopong merüktettsür, kechiyong mopong atemabo artsü ladanga maka. Kasaji, asenoki kima yimdong, arem aser ayongtem nung janaona mashimashi meindoki merüka yutsütsü merangba agi asen aliba tesem dang masü saka alima ajunga merüker, kechiyong ayong nung ayimba tzü asoshi kecha artsü ladanga maka, anungji aseni janaba agi tangar lima dena janatsür aser aseni merükba agi tanga lima dena merüktettsür. Itemji bilemdanga, tanü alima nung alir yimkong Lipuküm Anogo amongdang asenokia asen aliba lima kümzüksü asoshi mapa tila kabosa inyaktsü merangdi.

## OLEMSABANG

### LONGJEMBA YA TAPU AIKALIR

~ L. Kika Pongener.

Longjemba ya tapu aika lir. Longjemba ka talenba kecha meli-i tangatetba tajung agi longjemba...Iba telongjem nungji yimjung, akümtsübu aser tesendaktep tajung dena lir. Tanabuba longjemba kaji tenangzüktepa (Agreement) ka yur longjemba. Tatishitsü....Sorkar nung opposition mali Party ajak ka kuma longjemba...Iba longjemba yabo khen atema longjemba ta ashitsü akok; anungji kodang raksatsü'ar memetet. Ano longjemba ka....tashi mangara iba temzüng yagi merenshitsü ta takangba (Condition) ka yur longjemba; iba longjemba-jibo tashiyim agi longjemba asütsü. Ano longjemba kaji....Telok kar pei tebilemba aser nukjidong (Hidden agenda) ataloktsü mechi nung longjemba. Iba longjemba-jibo nukjidong tajung nung longjemba masü. Tanu asen lima nung talenba kecha meli-i yimjung aser tesendaktep tajung agi longjemba yagi kanga anungakonger. Kanga tesasatsü-ka, tanu asen Aor yimden, arogo, mungdang aser lokti aika tema tereprangtsü nung dang longjemba teimba angur.

Asenoki asen Ao kin sobaliba-a aruba teraji bushidanga ora; Chungliyimti lima alidang nungi asen Ao kinji kija aliba shilo ka masü, lokti aliba shilo ka ta asen sobaliba-a aruba otsüren aser mapatem nungjagi kuli tejangja angur. Otsüla-oboula nung Chungliyimti lima alidang nungi; yim tzüpo yimer ajunga longjemer mesem, alu talen lenmang külemi longjemer api, arem min nung sungdong tulu lensuka 'Sungkong' (Logdrum) chiteta yimer külemi longjemer yim tonga atsür atok. Arujo aser yim Salang yimer ajak külemi longjemer yanglu. Nija ki yangludanga 'Tongshi' tulu arem min nungi yimer, meposanger, kiyonger külemi yaritepa apur atok. Yamaji mapa ajak külemi longjemer inyaka aruba otsü angazüka aru. Iba amaji külemi longjemer inyakba agi tamakoktsü mapa ajak takok ngua inyaka aru. Tanua asenoki iba sobaliba tajungji mesamadaktsüi beshitsüla aser ret-reta wazüka ayutsüla. Aji oda, asen Aor tsürabur nungi beshia aruba sobaliba tajung kaji....Nubur tulu-tila ajaki shibaji shiba (?) Pei sasa pei jenjang angateter; kati ka akümtsübu, kati ka den amalitepa lia aruba agi tzüa meseni longjemer lia aru.

Tanu lokti senden nung ken o telemtetba agidang lokti teimbai mulungba nung telemtetba agir....Saka ano mapang ajak nungpo lokti teimbai mulungbaji ajakbo shitak masütsü akok. Mapang kar nungpo lokti tilabai mulungba suaka, alima sobaliba yimya ozüngi melaba (Universal truth) sura; iba nungji telemtetba agitsüla. Aji oda, tamanger temeja aliba yimden aser lokti asünung....Tsüngremi mulungbaji kechi asütsü (?) ibaji angateta; ibaji tongtipangba sudaktsür telemtetba agitsü kanga tongtipang lir. Israel-pur Ijip lima nungi atokdang, Mosa Sinai tenemi 'ozüng lungpak' abeni atuba menua maludang; Israel-purtemi Aron dang Ijip lima nung külemba ama külemtsü tsüngrem küang ta meshi. Aroni lokti tulu jagi khangshia anungbaji mesoiteti hon-taribi bendener 'Nashi chanu' ka mulur külemdaktsü. Mosa Sinai tenem nungi aludang aji ngur kanga ain atoka jashi....Aser Tsüngrem-ia Israel-purtem dang kanga jashi (Anitet-32:1-6). Livi chirtem dang ishika 'Nashi chanu' külemba nungji medeni liasü (Anitet-32:26). Iba otsü nung reprangra....Lokti tulubai aser teimbai (Majority) longjemer meshibaji Tsüngremi memulungbamapa ka liasü; aser Levi chirtem ishikaji (Minority) dang shitak liasü. Tanu asen lokti nunga mapang kar nungbo telok tilabai mulungba-jiang shitakba Tsüngremi mulungba asütsü akok.

(Maneni asüng adok...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Spain nung BGEA-i Festival of Hope evangelistic sentong agi



May 30-31 anogotem nung Spain yimtiba, Madrid nung aliba Vistalegre Palace nung ayongzükba 'Festival of Hope' evangelistic sentong nung tangokba noksa nung angur. Iba sentong ya Billy Graham Evangelistic Association (BGEA) local Arogotem den longjemer ayongzükba liasü.

**June 04, 2026:** May 30-31 anogotem nung Spain yimtiba, Madrid nung aliba Vistalegre Palace nung ayongzükba 'Festival of Hope' evangelistic sentong nung nisung meyrjang aika aden; iba sentong ya Billy Graham Evangelistic Association (BGEA) aser Spain nung aliba local Arogotemi longjemer ayongzükba liasü.

BGEA Tir aser sayutsünger, Franklin Graham-i, "Region nung denominations 15 nungi evangelical Arogo 900 jungnüai iba festival atema onok den yaritepa liasü," ta ashi.

Iba sentong jakdang ita aika

evangelism training agiba den nütsüngsüba aser lanurtem ayongdena liasü; iba denji külemi tamanger tasenpurtem local Arogotem nung züngsem kümdaktsü.

Nüngtugu sayutsünger asür Rev. Billy Graham'er jabaso Franklin Graham-i, iba festival tetenzük anogo nung nisung 12,600 aden aser Vistalegre Palace nung masemba agi nisung 2,000 bo kima amen, ta metetdaktsü.

Graham-i meimchir temenen aser Kangki nung Ysu Khristai taküm bendanga agütsüba ajanga meimchir nem taochi peria agütsüba indang

sayutsüngia liasü.

Graham-i, "Asenok ajaki temenen menaogo. Ajisüaka Tsüngremi asenok kanga meim nung asen menen alangzüktsü asoshi Pai Pa ajaso chir, Yisu Khrista yoka Kangki nung asü, aser asen menen alangzük," ta metetdaktsü.

Nisung noklang aikati yimjak nung temenen nangzükba Yisu Khrista agizükogoo.

Tekülem aser tetushi lenir Michael W. Smith aser Charity Gayle nati tekülem ken ania liasü aser Living Water Gospel Choir aser Sing ita teloki temeja ken tena liasü.

# Tenla ki amaker nisung 4 nem tasüba temerenshi obendang agütsü



Idris Abdulmalik Omeiza (abelen nungi tanabuba) Al Qasim Idris, Jamiu Abdulmalik aser Abdulhaleem Idris nunger noksa nung angur.

**June 04, 2026:** 2022 küm Nigeria nung Ondo state kübok Owo nung Tenla ki ka amakba ken o dak sendakba nung court kati nisung pezü aija par pezüprong alenseta südaktsütsü obendang agütsüogoo.

Tenla ki amakba, nisung puer aoba aser bomb amshia amakba lendong nung nisung aika asüba aser yiruba atema nisung pezüji aija Justice Emeka Nwite-i parnok nem temerenshi obendang agütsü.

Obendangeri nisung pezü- Idris Abdulmalik Omeiza, Al

Qasim Idris, Jamiu Abdulmalik aser Abdulhaleem Idris nunger nem tasüba temerenshi obendang agütsü. Kasa ken o nung nisung ka anemabo kuli peria manguba agi chiokogoo.

Par pezü nem tasüba temerenshi obendang agütsüba den külemi kiralongrar telok ka nung züngsema aliba agi parnok pezüprong taküm piyong tepuokdak ayutsü obendang agütsü.

Court-i ashiba agi, nisung pezü jagi 2021 küm East Africa nung kiralongrar telok Al

Shabaab nung aden, iba sülen central Nigeria nung public school ka amakba aser Owo nungi kilometer 19 shi pilar aliba tesem ka amakba densema parnok kiralongra mapa aika inyakogoo.

2022 küm June ita nung Tenla ki amakbaji Al Shabaab-i masü ta parnokibo metetdakja liasü.

2022 küm Tenla ki amakba sülen mezüngbo ketdangsertemi ibaji Islamic State West Africa Province (ISWAP) kiralongrar teloki lir, ta tai tonglokja liasü.

# ANOGO ABEN TSÜNGREM DEN

## Temulung atema teli

"Nenok shisabuluba ajak Pa dak yuang, kechiaser Pai nenok asoshi anepalur". - I Peter 5:7

Tsüngremer nübur anema Satani inyakba mapa tamajungtibaji temulung makai kümdaktsübaji lir. Tejen aser Tasen Lai ajunga nung temeshi nisungtemi ibai paidoktsü makok. Elijai Carmel nung takok angu, tasung nü juniper süngdong kübok kanga tasü meiti aküm. Ibai Tsüngrem nisungtemi ajangshia aruba lir.

Tenyar Paul madang jungkai adokba jenti liasü. Saka Pa temang nung ai ka asoshi paa tebilemtsü liasü. Pai iba dang "Satan nungi osangbener" Pa dak azüktsü yokba ta aja (2 Kor. 12 : 7). Pai ibaji agientsü asoshi Tsüngrem dang maneni mepishi. Saka Tsüngremi pa timtem endoktsütsü melen tashi dang itdaktsü. Ibai tejashitsü ka, saka Tsüngrem taochi agi iba tejashi tepela agi melentsü (2 Kor 12: 9, 10). Satan tamakok angu. Temulung makai akümtsü melen Pauli takok ola agutsü, "Kodang ni tashi maiter, idangji ni tashi itta alir".

Satani lenmang aisü nungi Tsüngrem nisungtem tasü mait kümdaktsütsü meranger. Saka yashi, tanü aser asung asen tebilemtsü ajak Tsüngrem dangi abentsü, kechiaser Pai anepalur ta Laishiba nung sayur. Telula, mesüra tetsübu; Pa teka anasa lir; Pa memelenshir, aser Pai asenok meimer; tamang dang amangdi arung.

# Egypt nung Tenla ki aika recognize asüba atema Khristantem pelar

**June 04, 2026:** Egypt nung ketdangsertemi Tenla ki aser Arogo dak sendakba kiojen aika recognize asütsü atema telemtetba agiba atema linük nung Khristantem pelar.

May ita nung Egypt Ato kilonser Mustafa Madbouly leniba nung cabinet senden ka amenba mapang nung Tenla ki aser Arogo kiojen 191 melatsü atema telemtetba agia liasü.

Arogo nung lenirtemi, tang Egypt nung ketdangsertemi Khristantem tekülem ki aika melaba ajanga Arogotem aika ajungmesor aser pelar, ta metetdaktsü.

Sorkar ketdangsertemi iba telemtetba agiba ajanga Arogo aika ajangzükogoo.

Egypt nung General Evangelical Baptist Assembly nung Tir, Rev. Khalaf Barakat-i, tesüiba küm ishika linük nung ketdangsertemi Arogotem den kanga amalitepa aruba atema Khristantem pelar, ta metetdaktsü.

Paisa, sorkar telemtetbatem ajanga Baptist Arogotem densema tanga denominations nungi Arogotem kanga tejakleni aoer, aser ano Arogo aika indang temepishiba anendaka lir, ta metetdaktsü.

Arogotem nem license agütsüba maparen achaayangtsü atema 2016 küm special government committee ka tentetba sülen tang tashi nung Tenla ki aser Arogo dak sendakba kiojen 3,804 sorkari recognize süogoo.

Tesüiba küm aika tsüngda Egypt nung sorkar dang nungi licence memeshii tekülem ki meyrjang aika süa liasü.

May 4 nü sorkari Parliament nung family law bills ana benoka liasü- ka Muslim dak sendakba

bill aser ka Khristantem dak sendakba bill lir.

Khristan dak sendakba bill ji kiyimba, balalulaba aser senmang densema kibongtem dak sendakba ozüngtem lir.

Tang iba draft ozüngji joint parliamentary committee kati asadangdar. Iba committee nungji ozüng tsütsü mongintem, yimsü aser loktiliba tsütsü mongintem aser meimchir temeden atema inyakertem densema lir. Iba draft ozüngji asadanga yanglushiba sülen Parliament nung benoktsü, ta osang ka ajanga metetdaktsü.

Parliament nung iba ozüngji agizükra ibaji Egypt nung denominations balala nungi Khristantem dak sendakba personal status code mezüngbuba asütsü.

Egypt nung Khristan denominations rongnung Coptic Orthodox, Syriac Orthodox, Greek Orthodox, Armenian Orthodox, Evangelical aser Catholic densema lir.

Parliament nung benokba bill nungji kiymtsü atema aniasüngtepba aser kiyimba inyakyim, balalulaba, balaba sülen tanur semdangtsü temeden, tsürabur teinyaktsü shilem, senmangba aser nisung samaba dak sendakba ozüngtem lir.

Parliament nung item ozüng agizükra kiyimba sentong magidang Arogoi jelia kiyimba sangdongtsü aser tetsür-tebur atema senmang temeden kasa dang asütsü.

2016 küm Egypt nung Church Construction Law agizükba liasü aser iba ozüng kübok Tenla ki asütsü atema temelaba agütsütsü asoshi provincial governors nem tashi agüja liasü.

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Yimkong**

(n) yim ka nung alir ajak

(all the villagers of a particular village, entire community members)

\* Ozü yimtak yimkong lumia sarasadema amung.

**Yimkümer**

(n) mezüing yim mesemteter ( founder of a viilage)

\* Yim ajak nung yimkümertem akümtsübutsula.

**OLONG PAITEP # 7525**

1			2			3			4
			5		6		7		
8									
			9						
	10								
								11	12
			13				14		
15						16			

**TIPIEN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_\_\_ lu - (3)
- 10. Takdang temalen - (9)
- 11. Tesa \_\_\_ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüingsak-mopung - (5)

**LANGTSÜNGLEN**

- 1. Reprangdaksü - (4)
- 2. \_\_\_ ur - (3)
- 4. Kiojen yangludak - (6)
- 6. \_\_\_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüing tajemetdak - (6)
- 12. \_\_\_ adenshi - (4)
- 14. Tsünüsenbongsü adokdak - (3)

**OLONG PAITEP # 7524 TELANGZÜBA**

**TIPIEN :**

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket,
- 14. Mangu, 15. Anünü, 16. Ango.

**LANGTSÜNGLEN :**

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

**NAI-A YA METETTER**



USA, Canada aser Mexico nung asayatsü aliba FIFA World Cup atema Trionda ta nungja agütsür official match ball sayaogo. Trionda tetezü 'three waves' lir aser iba ya tanga football dang nungi balaka design süa yangluogo.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

**Rajya Sabha election atema MDA-i James P K Sangma shimogo**

**Shillong, Aami/June 4 (Agencies):** Meghalaya Democratic Alliance (MDA)-i, National People's Party (NPP) lenir James P K Sangma state nungi taruba Rajya Sabha election atema candidate asütsü shimogo. June 18 nü Meghalaya nungi Parliament Upper House atema menden ka aliba atema election ya magi tsüingda MDA kübok party tem sensaksema sülen iba telemtetba ya agiogo.

Alliance lenirtem senden ka amenba sülen iba telemtetba ya agi, kong züingsemtemi candidate shimtsü atema inyakyim aser nominee tem atema sensaksema liasü. Party balala nungi lenirtemi tenüing balala benok aser parnok candidate tem nongita yaritsü atema jembitepa liasü.

Sensaksema kayonga aoba mapang alliance partner temi tenüing balala benoker aliba nungi ajaki mulungba nominee ka meshimtetli liasü. Mangatettep madokdaksütsü aser telungjem



James P K Sangma

meraksadaksütsü atema party temi alliance nung züingsem timba aliba party-i benokba candidate shimtsü telemtetba agi, koba NPP lir.

Sensaksema sülen lenirtem ajaki NPP indang candidate James P K Sangma ya Rajya Sabha election atema parnok candidate asütsü mulunga agizüka liasü.

Kasa mapang nung senden nungsa Shillong Parliamentary

constituency nung taruba by-election atema-a sensaksema liasü. Alliance partner temi bypoll nung party shiai pei dak apet telemtetba agitsü mulungtepogo.

Sangma-i pa indang nomination papers ya June 5 nü benoktsü imlar.

Rajya Sabha election nung tokteptsü atema pa shimba atema Sangma-i NPP lenirtem aser alliance partner tem dang kanga pelaba lemsatepogo. Social media post ka ajanga Rajya Sabha menden ka atema MDA pa nominate asüba atema kanga pelaba lemsatep.

Maneni pai Chief Minister Conrad K Sangma, Deputy Chief Ministers Prestone Tynsong aser Sniawbhalang Dhar den United Democratic Party (UDP), Hill State People's Democratic Party (HSPDP), Bharatiya Janata Party (BJP) aser independent legislator tem dang parnoki pa nongita yariba atema kanga pelaba lemsatepogo.

**Assam: BTC-i nashi jang shishilembaba asüingsashitsü agizükogo**



tang shishilembaba inyakyim nung lokti tentet tulubatem nem shilem agidaksütettsü ta ketdangsürtemi amanger.

Tanga telemtetba ka nung council-i, BTR kübok jila aser yimtak yimtsüngtem nung ali makaba temsüa aliba lisopurtem nem ali patta lemsütsü asoshi agizükogo. Ali kibur aser kuli kakat dak sendakba nung mapang talangka ken o bangdaker aliba bentettsütsü asoshi iba telemtetba agiogo.

Basumatary-i ashiba agi, ali agütsütsü telemtetba agiba ya Bodoland People's Front (BPF)-i tenangzükba agütsüba ataloktsüba ka lir, aser iba ajanga kibong aika ajangzüksü ta amanger, shirnok ket nung parnoki atsünger aliba ali atema temzüing ozüing dak ajemdaker temeden mali.

Maneni item onüktem benoka inyaksü, shirnok temsüa ali aser kodang nungi iba inyakyim tenzüksü iba indang guideline tem mapangtong nung agütsütsü ta ketdangsürtemi ashi.

**Guwahati, Aami/June 4 (Agencies):** Bodoland Territorial Region (BTR) kübok yimtak yimtsüng nung rongsenketzüing tajungba kümdaksütsü aser ali dak sendakba nung ken o bangdaka aliba bentettsü atema Bodoland Territorial Council (BTC)-i tongtibang telemtetba ana agiogo.

June 4 nü Kokrajhar nung BTC headquarters nung Executive Council senden ka amenba sülen Executive züingsem Maheswar

Basumatary-i osangbenertem dang, council-i nashi jang shishilembaba asüingsashitsü aser BTR kübok shishilembadak tasentem amenoktsü atema temelaba agütsüogo, ta ashi.

Pai ashiba agi, nashi chang shishilembatsü tesendaktep tajungba kümdaksütsü aser aluyimer, nashi jang metsürtem aser titateri shishilembartem nem sabang tajung ka agütsütsü atema iba jenjang agiogo. Iba ajanga yimtak yimtsüng nung alirtem sen aazütsü atema maongka tuluba agütsütsü aser

**Manipur: Temesepba mozü anema meita aoba mapang constable ka tepset**

**Imphal, Monupii/May 4 (Agencies):** Bodhbar aonung temesepba mozü shibelenba anema meita aoba mapang Manipur Police head constable ka tepsetogo.

Tanga tatalokba ka nung Manipur kübok Thoubal district nung tesem ka meita aoba mapang temesepba mozü shibelener ka den tenokdangba agütsür aliba pharmaceutical capsule tem puogo, ta ketdangsürtemi Brehostibarnü metetdaksü.

Police-i ashiba agi, Head Constable Khoirom Suresh,

shiba Thoubal district commando unit nung attach süir liasü, pa ya Bodhbar aonung 8 ako meta Thoubal Police Station kübok Moijing Meena Bazar Thongkhong nung temesepba mozü ayoker asütsü ta temulung melembi bilemer ka aputsü merangba mapang kotari agi tsüingseta liasü.

Meita aoba mapang pa kanga mejungi yiru aser Thoubal District Hospital-i anir ao, kong doctor temi pa süiogo ta metetdaksü.

Ken o dak sendakba nung

police temi Lilong Police Station kübok Nungei nung Lilong Dam anasa garitem soter bushisüingdangba mapang Lilong Nungei nung alir MM Warish (33) puogo, ka ketdangsürtemi metetdaksü.

Ketdangsürtemi ashiba agi, pa ket nungi Serratiopeptidase (SP) capsules strip 18 den pa senzüsenpongtsü atema amshiba two-wheeler ka puogo.

Tatalokba anaprongla dak sendakba nung ken o benokogo aser bushisüingdang maneni südar.

# Iran rara tembangtsü mera agitsü atema US House-i vote agütsü

**Washington, Aami/June 04 (Agencies):** Republican-i anir aliba U.S. House of Representatives nung Tir Donald Trump-i Iran anema raraba nokdangtsü asoshi pangzüng ka Bodhbarnü agizükogo, anungji par party züngsemtemi ita asem rara indang tebilemtü akaba sayur.

House-i vote agütsüba ya 215 - 208 liasü, kechiaser Republicans züngsem pezüi Democrats den külemi 'war powers resolution' bhukuma vote agütsü, kobai Trump dang Congress ajanga rara mesangdong tashi mesüra mitkar tashi amshitsü temelaba magütsü tashi Iran nungi US sepaitem anir arua alitsü tuyur.

House aser Senate nung par party züngsem tera agi timba liaka ibai Congress nung Trump asoshi tetsükdaktsü tesüsaba alitsü.

Tang asoshi iba vote ya tebilemba lemsatepba amai lir, kechiaser iba ya mapa kuma inyaktsü asoshi Senate aser House nung agizüksüla, aser war powers resolutions ya Congress nung agizükyonga constitutional asütsü asü masü ta o intepba mapang lir.

Ajisüaka iba vote ajanga Trump-i rara ketdangtsüba nung Republicans kar anisüngzük mongutetba sayur aser party telemsa makai tir dak rara tashitem aliba azüoktsü merangba ka lir.

Taoba mapang House nung asemben tashi war powers resolutions ya terara agi majangtet aser taoba ita iba pangzüng ya agizüksü ama lia chamber nung Republican lenirtemi aritepa vote ya thina liasü.

Brehostibarnep Trump-i iba vote ya linük memeim aser Islamic Republic of Iran den rara tembangtsü jembishinü tiyong nung arur ta ashi.

Social media post ka nung, iba ken o nung Democrats den adener Republicans temi aktsüla, ta pai ashi.

Senate nung taoba ita iba mesük pangzük ka agizüka liasü, koba taoba mapang tenetben merangba nung tamakok ajurua liasü. Senate nung ano vote agitsü atema ano mapang melatet.

War powers resolution atema vote agütsüba House Republicans pezü ya Michigan nungi Representatives Tom Barrett, Ohio nungi Warren Davidson, Pennsylvania nungi Brian Fitzpatrick aser Kentucky nungi Thomas Massie alitsü.

Democrats züngsem katia iba pangzüng anema vote magütsü aser House züngsem tenet-i vote magütsü.

Congress nung par party züngsem kari Trump indang sentong anema kumogo.

Ano Bodhbarnü House nung Ukraine Support Act atema

vote agiteptsü asoshi procedural motion ka agizükogo, koba ajanga Ukraine-i Russia den raraba nung security aid agütsütsü.

Petition ka nung nüngdaka aliba meyongnem 218 taoba ita agütsüba sülen iba act ya floor tonga liasü.

Yangjia Republicans züngsem trok aser teti Republicans den vote agütsür independent züngsem kati iba Act bhukuma vote agüja liasü.

Anogo ishika tejakdang ang Republicans temi "weaponization" fund tenzüksü Trump indang sentong aliba anema nokdaka liasü.

Democrats temi Trump dang Iran rara nung mitkar tashi amshitsü temelaba agitsü asoshi Congress-i arung ta ashir aser US Constitution nung tir masü legislature kisüngi rara sangdongtsü melar ta ashir.

Parnoki, sentong tejangja ka meyanglui Trump-i linük ya mapang talangka raraba nung anir aor, ta ashir aser US-Israel nati February 28 nü nungi tenzükä Iran dak tayimtsü amshia amakba sülen totzü, chiyongtsü aser tanga osettem nung jenjang tali akumba anema nokdaker.

Trump administration-i Iran nung rara ya US national security asoshi nüngdaker ta ashir aser Iran-i nuclear nok-nü yangluba nokdangtsü nüngdaker ta ashir.

# Israel aser Lebanon nati ceasefire ka mapa kuma inyaktsü mulungtep

**Dubai, Aami/June 04 (Agencies):** Israel aser Lebanon nati tsükchitep tembangtsü asoshi ceasefire ka mapa kuma inyaktsü mulungtepogo, ta Trump administration-i Bodhbarnü ashi, koba ajanga Iran nung US-Iran nati raraba tembangtsü asoshi tezüngzüktep tuluba ka yanglutsü teimla ulushitsür.

Tehran-i US den kechi tezüngzüktep yangludir yangluaka yangji Israel aser Lebanon tsüngta raraba tembangtsü indang alitsü ta shia lir, aser parnoki iba tezüngzüktep meyangludang Kuwait nung maka airport ka raksatsü aser nisung aika yirutsü aser US mitkaria Strait of Hormuz anasa maka liasü.

Israel-Lebanon ceasefire ya Iran den sendaktepa aliba Hezbollah telungpuri amakba jungjunga anenba aser par operatives ajunga South Litani Sector nungi ainshiba dak keta lir, ta US State Department ajanga Washington nung jembishinü akaba sülen külemi sangdong ka nung agütsü.

Israel aser Lebanon ya ceasefire alitsü taoba ita mulungtepa liasü, saka maneni rara aru. Lebanon nung Hezbollah telok bushia Israel-i March ita Lebanon amak, shirnoki Tehran bhukuma arütsü alema injang-bomb khalokja liasü.

Kuwait aser strait nung amakba ya US-Israel aser Iran tsüngta tashi mait ceasefire ka yanglua aliba tendangba ka lir, aser totzü jenjang shilem ana jungnüa agi tali kumdaktsü, kechiaser US aser Israel nati Iran amak tenzükä ita asem dak tema strait ya shibanga lir.

Iran-i drone aser missile amshia amakdang airport facilities aser diplomatic missions raksatsüba sülen Kuwait International Airport nung tayimtsütem soita lir, kong

nisung ka tepset aser 60 dak tema yiru, ta Kuwait ketdangtsür temi ashir.

Mapang tatsüka lir Kuwait Airways aser Jazeera Airways tayimtsütem senzü tenzük.

Iran indang elite Revolutionary Guards temi Kuwait indang airport nung makha ta ashir aser US interceptor missiles temi par targets nung mokongshiteti airport nung kongshi, ta tenüng asener.

US mitkari aji shidak masü aser Iran indang drones agi asaa airport nung kamak ta ashir.

Revolutionary Guards temi Bahrain nung US Fifth Fleet indang headquarters aser US airbase aser Panaya ta sür rong ka amak, ta Iranian media ajanga shia lir. US Central Command-ibo par bases mamak aser Iranian ballistic missiles ajanga region nung targets nung mokongshitet ta ashir.

CENTCOM-i southern Iran nung "defensive strikes" tasen ka tenzükä missile launch sites aser Iran nung rong tem mines ayutsü merangba amak aser Strait of Hormuz anasa Qeshm Island nunga amak ta ashi.

US aser Israel nati February 28 nü nungi tenzükä Iran dak amakba sülen Tehran-ia Gulf region nung US military bases alidak maneni amak.

April tetenzüklen ceasefire sangdongaka hopta ishika tsükchitep tali akumer, aser US-i Strait of Hormuz tanaben lapoktsü meranger, koba ajanga rara metenzükdang alima nung totzü aser liquefied natural gas shilem 20 shi bena liasü.

Taoba hopta Iran aser US nati rara anena strait tanaben lapoktsü asoshi tezüngzüktep ka yanglur ama sayu, saka linük ana yagi iba tezüngzüktep nung ano meyongnem magütsü lir.

(Maneni tapak 8 nung...)

# Sri Lanka care home ka mi agi rongdok, nisung 12 asü

**Colombo, Aami/June 04 (Agencies):** Sri Lanka nung care home ka nung kitsük-kirong lendong atalokba nung nisung 12 asü aser trok yiru, aser iba home indang manager puogo, ta ketdangtsürtemi Brehostibarnü ashi.

Sri Lanka yimtiba, Colombo south len Batagoda nung aliba Maupiya Sewana Elders Home ya Bodhbarnü mi agi jadoka arong. Iba tesem nungya tekolok nung timtem alir nisung

tain aser tanurtem liyaa liasü. Iba lendong atalokdang iba tesem nung nisung 71 telidak liasü. Asürtem rongnung tanubosang ya arishi küm 17 tain tebur ka liasü.

Iba lendong atalokba nung tai tonglokja alisang Brehostibarnü puogo.

Bodhbarnü yangji alir nisung 51 aser staff tem kumzükä anasa aliba government facility kati anir ogo, ta police otongtar Fredrick Wootler-i ashi.

"Iba mi adokba tera bushisüngdangtsü atema onoki forensic teams tem jaogo," ta iba tesem nungi police tanishir kati osangbener dang ashi. Anguruwatota police ajanga iba mi adokba bushisüngdangba mapang lir.

Sri Lanka nung osang Adaderana ajanga ashiba agi, Horana Magistrate Lakmini Vidanagama-i Brehostibarnep iba tesem semdanga magistrate's inquiry ka agiogo.

**GOVERNMENT OF NAGALAND**  
**DIRECTORATE OF SAINIK WELFARE & RESETTLEMENT**

No. Home/SSA/8/81 (Vol-VII) Dated, Kohima the 27th May 2026

**NOTIFICATION FOR INTERVIEW**

- It is hereby informed that Interviews of candidates who have applied for the post of Drivers in response to the Advertisement No. HOME/SSA/8/81 (Vol-VI) dated 15 May 2025 by the Directorate of Sainik Welfare & Resettlement, Government of Nagaland will be conducted by the Selection Board as per the following scheduled :-  
(a) 16 Jun 2026, 10:00 hrs : Driving Test.  
(b) 17 Jun 2026, 10:00 hrs : Written Test and Interview.
- Note :-**  
(a) Only those candidates who have been found eligible after scrutiny of documents and other details provided by the applicant, may appear for interview for the posts applied.  
(b) The candidates may visit the Directorate of Sainik Welfare & Resettlement and the ZSBs, where the list of eligible candidates will be put up on Notice Boards.  
(c) In case a candidates is shown as ineligible for interview and he is not satisfied with the reasons given for being considered ineligible, he may submit a written Representation giving the grounds on which he should be considered as eligible, to the undersigned by 10 Jun 2026. The Selection Board will examine such Representation, if any, and take a decision regarding the eligibility and convey to the candidate, which shall be final.  
(d) All candidates shall furnish their original personnel/ service documents before the Selection Board, at the time of interview.  
(e) It may be noted that the attendance in the interview does not mean automatic selection. The final selection and appointment subsequently, of any eligible candidate will depend on the overall qualification of the candidate, his suitability and performance decided by the Selection Board, vis-a-vis other candidates and as per the requirements of the Directorate of Sainik Welfare & Resettlement.

-Sd/-  
**[Capt (IN) Lalsuonglien Tonsing (Retd)]**  
Director  
Directorate of Sainik Welfare & Resettlement

**THE NATIONAL INSTITUTE OF HEALTH AND FAMILY WELFARE**  
(An Autonomous Body under the Ministry of Health and Family Welfare)

**ADMISSION SANGDONG (2026-27)**

**POST GRADUATE DIPLOMA IN MANAGEMENT (PGDM)**  
(Recognized by the All India Council of Technical Education (AICTE) and Approved by the Ministry of Health & Family Welfare, Govt. of India)

Distance Learning yimya nung tsünglanglen Course ya sangdonger:

1) Hospital Management	300 Seats
2) Health & Family Welfare Management	100 Seats
3) Health Promotion	150 Seats
4) Public Health Nutrition	150 Seats
5) Health Communication	150 Seats
6) Applied Epidemiology	150 Seats

Tekalen aliba courses ya **Medical aser Non-Medical Graduates** asoshi lir.

Osang tejangja, Prospectus aser Application Form atema  
Distance Learning Cell, Room No.417, The NIHFW,  
Baba Gangnath Marg, Munirka, New Delhi-110067  
Tel. +91-11-2618 3416, 26165959 / 26166441 nung tongteprateptsü  
mesüra website [www.nihfw.org](http://www.nihfw.org) nung angutsü.

Application agütsütsü anogo tatem : 14th August 2026.  
(Late Fee dener 31st August 2026 tashi atsülangtsü akok)

Director, NIHFW

CBC : 17153/11/0001/2627

# Kohima nung Pre-Subroto asayamung tenzükogo



**Kohima, Aami/June 4 (TYO):** Pre-Subroto International Tournament (Zone-I) lapokba sentong Brehostibarnü Indira Gandhi (IG) Stadium, Kohima nung agiogo. Iba asayamung ya Department of Youth Resources & Sports (DYRS) aser Kohima District Football Association (KDFA) na longjemer ayongzüka asayadar.

Sentong nung KDFA tir aser Kohima Village Youth Organisation tir M. Mathew Yhome alaketa jaoker liasü.

Sentong nung jembiba mapang Yhome-i iba asayamung ya koda tongtibang iba indang lemsatop, aser ashiba agi, parnok mapang nungbo Subroto International Tournament atema selection ya ajak dang tetushi tulutiba ama züngshia liasü aser asayartem iba maongka asoshi kanga toktepa asaya.

"Tanübo nenok ya maongka aika anguba putu ka lir. Nenok iba ground nungi tenzuka nenok school tem ajanga Nagaland tenü nung asayatsü maongka lir," ta pai ashi.

Paisa, lanur asayartem dang takok ya manger

mesangwa tsünga mangur ta shia, iba asayamung ya tatemba ka ama masü saka tetenzüker ka ama agitsü ajungshi.

"Iba asayamung ya tatemba masü. Iba ya nenok asoshi mezüngbuba jenjang lir aser Tsüngremi nenok nem kechi sempet agüja ali aji alima dang sayutsü mezüngbuba maongka lir," ta pai ashi.

Asayamung nung shilem agirtem dang pei sempet jangjatete terenlok atema inyaksü ajungshia Yhome-i parnok dang sporting discipline dak rangloksü aser bendanga agüja inyaksü ajungshi.

State nung saisabong balala renloka aoba indang jembiba mapang pai, Director of Youth Resources & Sports, Kethosituo Sekhose-i tongtibang shilem agiba atema pa nem tenüsang agütsü aser pa lenisüba nung Nagaland nung saisabong kanga renloka odar ta ashi.

Paisa, taoba mapang India nungger footballer Roko Angami aser Vizovor Liezietsu nungger amala asayartem ya lanurtem atema nükrangdong lir ta ashi.

"Nenok nokdaka aliba tesem nung parnoka khenbo nokdakogo. Parnoki minprong balala melena discipline shim aser shortcut melena sportsmanship shimba ajanga tanü parnok akümtsübur," ta pai ashi.

Lanurtem dang yimya tamajung nungi pila alitsü ajungshia Yhome-i, parnok ajak ya tsürapur, school aser lokti nema dangdaksüba nisung kaka akümtsü ajungshi.

"Meranga, yimya tajungtiba agi asayang aser onok nema dangdakjang. Iba asayamung nungi team tajungtiba ana Zone-I tenü nungi State asayamung asayatsü alinung nenok ajaki junga asayatetsü imlaja atar. Kohima District nema dangdakjang," ta pai ashi.

Iba sentong ya District Youth Resources and Sports Officer (DYRSO) Atoli Yephthomi lenisüba nung agi aser KDFA Senior Vice-President Khriengulie Rio-i Tsüngrem temaotsü meshizüka sarasadema liasü.

Ajak senteper iba asayamung Kohima, Phek, Tseminyu aser Meluri district nungi team tenet-i shilem agidar.

# Afghanistan den ODI asayamung nung Kohli masayatetsü akok

**Aami/June 4, 2026 (Agencies):** Virat Kohli hamstring yiruba ajanga Afghanistan den taruba ODI asayamung nung masayatetsü akok. Pa koba mapang tashi nung aneptsü mejangja saka taoba mapang India captain ya iba asayamung nung masayatetsü akok. Osang ajanga ashiba agi, Royal Challengers Bengaluru (RCB) nungi IPL akokba sülen Kohli ya tang Europe nung oa lir.

Taküm IPL asaya nung Kohli-i kanga junga asaya-a pai run 675 yanglu (average 56.25), kong century ka aser half century pongu yangluba densma lir. Gujarat Titans den final asayaba mapang pai out mesüi run 75 yanglua liasü. May 31 nü batting amenba mapang pa hamstring nung timtem adok aser tetsüng alepbanger ia asayatsüsa aküm.

Kasa mapang nung Rohit Sharma-a iba asayamung nung asayatsü masayatsü mejangja. Taoba India captain ya fitness assessment aser clearance atema BCCI indang Centre of Excellence (CoE)-i tang tashi moi lir, aser iba yongji pa iba asayamung asayatetsü masayatetsü mejangjai lir.

Rohit aser Hardik Pandya naprongla iba asayamung atema shimogo, saka tena temang tajungba kümer ali nung dang asaydaksütsü ta shir liasü. Hardik bo Bengaluru nung BCCI indang Centre of Excellence (CoE)-i ogo.

Temetetsü kaji Ajit Agarkar-i anir asayar shimertemi Afghanistan den ODI asaya asem atema ya asayar tejen ana ya anisüngzükdaksütsü asoshi asadang saka temulung meleshia team nung züngoksema liasü.

Asayar shimertem aser team management-i top order nung Shubman Gill den Yashasvi Jaiswal a s a y a d a k t s ü d a n g t s ü benokdang saka Rohit-i maneni pa jenjang maitsüi lir.

Asayar anaprongla ya tang hamstring yiruba anepaludar, aser ibayongji team nung asaya ana shimoktsü akok. Virat masayatetsü ta bilemba den Rohit-a asayatsü masayatsü mejangjai aliba mapang Jaiswal ya squad nung züngoksemtü imlar aser asayar shimertemi middle-order nung Ruturaj Gaikwad, Devdutt Padikkal mesüra Tilak Varma nungger asadangtsü akok.

Telemtetba ya June 6 nü agitsü imlar, kechiyong asayar shimertem June 6 nü Ireland aser England na den taruba white-ball asayamung atema squad shimtsü asoshi ajuruteptsü.

**IND vs AFG ODI Series mapanglem**

**1st ODI:** June 14, 2026 - Dharamsala - 1:30 PM IST

**2nd ODI:** June 17, 2026 - Lucknow - 1:30 PM IST

**3rd ODI:** June 20, 2026 - Chennai - 1:30 PM IST.

# World Cup mapang tanaben amshitetba tzu bottles amshitsü memelatsü

**Aami/June 4, 2026 (Agencies):** World Cup tenzüktsü anogo ishika dang lia FIFA-i parnok indang policy melenshia fan tem world cup asayaba tesemtemi tanaben amshitetba tzu bottle tem bener arutsü memelatsü ta shiogo. Asayartem aser asaya repringertem kümzüka toktsütsü atema iba jenjang agiogo.

Iba ita tetenzüklen FIFA indang official code of conduct kübok clause ka nung asaya repringertem nem "liter ka tashi transparent, tanaben amshitetba plastic bottle tazüngtem bener arudaksütsü ta shir liasü.

Mereploktsü nungbo yirutsütsü ana nung aliba bottle, cup, jar aser can amala tanga osetema stadium-i bener arutsü memelatsü.

FIFA otongdar kati, asaya repringertem aser asayartem kümzüka toktsütsü asoshi iba ozüng ya melenshiogo, ta ashiba



den World Cup venue aika nung tanaben amshitetba tzu bottle tem bener marutsü atema tenokdangba agütsür lir, ta shisem.

"Asayar, referee, fan, volunteer aser staff tem ajak kümzüka toktsütsü atema FIFA bendanga agütsür lir," ta sangdong ajanga metetdaksü.

"Asayar aser asaya repringertem yirutsü ana nung aliba temulungdang yur iba telemtetba agiogo. Venue aika nung kima nungi bottle tem bener marutsü asoshi tenokdangba agütsür lir aser FIFA-i tang iba ya asayamung stadium ajak nung benoka inyaker," ta kasa sangdong ajanga metetdaksü.

Maneni, bottle tem ya venue telung nung ayoktsü aser stadium ajak nung jenjang kasa dang asütsü, ta metetdaksü.

Kasa mapang nung stadium tem nung misting station, fan hydration station aser cooling tent tem amenokja alitsü.

Mongintemi ashiba agi, kanga tatsük asüba ajanga asaya repringertem health lendongbang nung toktsütsü akok.

World Weather Attribution-i bushisüngdangba sülen 2026 FIFA World Cup nung asaya 104 nungi 26 bo Wet Bulb Global Temperature (WBGT) degrees 26 dang nungi timba nung asayatsü, ta ngutetogo.

Taoba küm USA nung FIFA Club World Cup asayaba mapang fan temi temperature tali akümba aser asaya repringertem asayaba tesemi tzu bottle bener arutsü memelaba indang ashishia liasü.

# BENDANGLI OSANG : Tapak 7 nungi...

## Israel aser Lebanon nati ceasefire...

Iran indang Foreign Minister Abbas Araqchi-i Bodhbarnü Lebanese broadcaster Al Mayadeen dang jembishinü manen saka terenlok mali ta shia liasü.

Tehran-i Lebanon nung rara tembangdaksünüba den ano totzü nungger revenue aruba sen dollar billion aika aginer, totzü tazü tanga linüktem dang ayoktsü nokdanga aliba agiendaksüner, US-i par rongnendak tesemtem nokdanga aliba lapokdaksüner aser strait nung par tajangzük maneni aginer.

US Tir Donald Trump, shiba totzü jenjang ajemtsü asoshi tebilemstü akar, pai pa indang tongtipangtiba teinyaktsüji Iran nem nuclear

nok-nü meyagludaksütsü ya lir ta ashir.

Iran-i par nuclear program ya yimjung asoshi lir ta ashir. Sensaksemba ka Bodhbarnü sayaba nung, Iran-i nuclear nok-nü mamshitsü mulungogo aser iba jembishinü nung Khamenei dena lir, ta Trump-i ashi.

Bodhbarnü Trump-i hopta tatem tashinung Iran den jembishinüba nung terenlok alitsü ta ashi.

"Ibaji atalokra, hopta tatemi ataloktsü," ta Trump-i White House indang Oval Office nungi osangbener dang ashi. Ken o jembishinür temi strait tanaben lapoktsü aser Lebanon nung raraba ken o balala kumdaksütsü meranger ta pai ashi.

**BILEMDANGANG**  
**"Jaklayimya tajung ajakji tatidang akokba nungi adoker."**